

# KDNK suku keempat 2023 dijangka capai 4 peratus

**PETALING JAYA:** Pakar ekonomi menjangkakan Keluaran Dalam Negara Kasar (KDNK) berada pada paras 3.7 peratus hingga empat peratus pada suku keempat 2023, didorong oleh permintaan domestik dan perbelanjaan swasta.

Bercakap kepada *Utusan Malaysia*, Ketua Ekonomi dan Kewangan Sosial Bank Muamalat Malaysia Berhad, Dr. Mohd. Afzanizam Abdul Rashid berkata, pertumbuhan juga akan dipacu oleh pelaburan yang membantu prestasi ekonomi negara.

Menurut beliau, faktor bermusim seperti cuti sekolah dan perayaan juga membantu dalam meningkatkan perbelanjaan domestik, di samping pasaran buruh yang dianggap telah berada di paras guna tenaga penuh.

“Kadar pengangguran juga terus menurun ke paras 3.4 peratus pada bulan Oktober 2023 berbanding 3.6 peratus pada bulan Disember 2022,” katanya di sini, semalam.



**PERBELANJAAN domestik antara faktor yang memacu pertumbuhan ekonomi negara. - GAMBAR HIASAN**

Bagaimanapun, beliau berkata, cabaran utama untuk mencapai unjuran itu adalah prestasi ekonomi luaran yang dijangka

kian mencabar.

Afzanizam berkata, jangkakan penurunan kadar faedah Amerika Syarikat (AS) pada tahun 2024

menandakan ekonomi negara itu diunjur bergerak perlahan.

Tambahnya, ekonomi China yang dibelenggu oleh kelembapan pasaran hartanah juga bakal memberi kesan negatif kepada ekonomi global disebabkan kuasa beli rakyat negara itu yang merosot.

Bank Negara Malaysia (BNM) dijadual akan mengumumkan perkembangan ekonomi dan kewangan suku keempat 2023 pada 16 Februari depan.

Malaysia merekodkan pertumbuhan ekonomi yang kukuh pada suku ketiga 2023 pada 3.3 peratus melebihi jangkakan penganalisis. Pencapaian itu juga lebih baik berbanding 2.9 peratus yang direkodkan pada suku sebelumnya.

Sementara itu, Pensyarah Kanan Putra Business School (PBS), Prof. Madya Dr. Ahmed Razman Abdul Latiff berkata, Malaysia sentiasa mencatatkan KDNK suku keempat yang lebih tinggi dari suku ketiga dari segi

nilai ringgit sejak 2019.

“Jadi, tidak mustahil untuk mencapai pertumbuhan empat peratus bagi suku keempat tahun 2023,” ujarnya.

Dalam pada itu, Pensyarah Kanan Sekolah Perniagaan dan Ekonomi Universiti Putra Malaysia (UPM), Dr Mohamad Khair Afham Muhammad Senan pula berpandangan, pasaran buruh yang menunjukkan penurunan dari sudut statistik kadar pengangguran pada suku ketiga 2023 juga memberikan impak positif kepada KDNK.

Tambah Khair, pengumuman kenaikan dividen Amanah Saham Bumiputera (ASB) yang diumumkan baru-baru ini juga akan mencetuskan penggunaan yang lebih tinggi dalam suku keempat 2023.

“Ini adalah kesan daripada kepercayaan pelabur yang mana mereka merasakan ada lebih pendapatan yang boleh digunakan untuk berbelanja,” katanya.